

खबरां

- प्रधानमंत्री नरेंद्र मोदी होरें जपान दे प्रधानमंत्री सनाए टाकाएची हुंदे कन्नै नमीं दिल्ली च सालाना सम्मेलन स्तरीय गल्लबात कीती, दवें देशें आर्थिक ते उर्जा सुरक्षा, दोआइएं ते ए.आई दे खेत्तर च किश सहमति पत्रें पर हस्ताक्षर कीते।
- प्रधानमंत्री मोदी होरें आखेआ जे भारत-जपान दे दपक्खी रिश्ते समें दे तकाजे पर खरे उतरे न।
- अंतरराष्ट्री आतंकवाद पर व्यापक सम्मेलन आस्तै भारत दे प्रस्ताव गी संयुक्त राष्ट्र महासभा च परतिए समर्थन थोआ ऐ।
- श्री अमरनाथ जी जात्तरा लेई श्रद्धालुएं दा पहला जत्था जम्मू दे भगवती बेस कैप थमां रवाना।
- दक्खन पच्छमी मानसून दा असर पूरी दिल्ली लब्बेआ, मानसून दक्खनी ते पच्छमी राज्यें बक्खी बी बदेआ।
- फीफा विश्व कप च अमरीका नै बोस्निया ते हरजेगोविना गी 2-0 कन्नै हराइये पैहली नाकआउट स्टेज जित्त दर्ज कीती। बैल्जियम नै सेनेगल गी बादू समें च 3-2 कन्नै हराइये राउंड आफ 16 च प्रवेश करी लैता ऐ।

<><><><><>

Indo-Japan Agreement

भारत ते जपान नै अज्ज बक्ख-बक्ख क्षेत्रें च सहमति पत्रें पर हस्ताक्षर कीते। इन्दे च आर्थिक ते उर्जा सुरक्षा, दोआइयां, रक्षा ते आर्टिफिशल इंटेलिजेंस शामिल न। प्रधानमंत्री नरेंद्र मोदी होरें जपान दे प्रधानमंत्री साने टाकाएची हुंदे कन्नै नमीं दिल्ली च सालाना सम्मेलन स्तरी गल्लबात कीती। गल्लबात मगरा, संयुक्त प्रेस कांफ्रेंस गी संबोधित करदे होई प्रधानमंत्री मोदी होरें आखेआ जे अज्जै-कल्लै दे समें च आपसी विश्वास सब्भनें शा बड्डी दौलत ऐ ते भारत जपान बश्कार दपक्खी सांझेदारी समें कनै बरकरार ऐ। उनें लो पाई जे भारत ते जपान दुनिया दी सब्भनें शा बड्डी अर्थव्यवस्थाएं च शामिल न ते मुक्त भारत प्रशांत दवें मुखें दी सांझी प्राथमिकता ऐ। दवें देश आर्थिक सुरक्षा ते उर्जा सुरक्षा दा महत्व समझदे न। उनें जोड़ेआ जे तकनीकी सांझेदारी भारत-जपान सहयोग दा सब्भनें शा महत्वपूर्ण थम्म ऐ। मोदी होरें आखेआ जे इस धेइये गी पूरा करने आस्तै भारत ते जपान नै ए.आई दे क्षेत्र च संयुक्त बयान जारी कीता ऐ। प्रधानमंत्री होरं जानकारी दिती ऐ जे रखा दे खेत्तर च दवें देशें पैहले सह विकास परियोजना बारै सहमति पत्र पर हस्ताक्षर कीते न। एहू परियोजना भारत-जपान बश्कार होग।

<><><><><>

अंतरराष्ट्री आतंकवाद पर व्यापक सम्मेलन आस्तै भारत दे लम्में चिरें थमां चले आवा रदे प्रस्ताव गी संयुक्त राष्ट्र महासभा च परतिऐ समर्थन थ्होआ ऐ। 140 सदस्यें आसेआ अपनाई गेदी संयुक्त राष्ट्र दी वैश्विक आतंकवाद रोधी रणनीति दी 9मीं समीक्षा च सदस्य मुल्खें थमां आग्रह कीता गेआ ऐ जे ओह भारत आसेआ त्रै दाहके पैहले प्रस्तावित सम्मेलन गी खीरी रूप देने आस्तै हर संभव जत्न करना। संयुक्त राष्ट्र च भारत दे स्थाई प्रतिनिधि पी. हरीश नै आखेआ जे सर्वमान्य कनूनी ढांचे दा अभाव वैश्विक आतंकवाद रोधी जत्नें गी कमजोर करदा ऐ। उनें आतंकवाद कन्नै निब्वडने च दौहरे मापदंड नेई अपनाने पर जोर दिंदे होई अपराधिऐं वित्त पोषकें ते प्रायोजिकें गी जवाबदेह ठहराने दा आह्वान कीता।

<><><><><><>

VB-G Ram G

विकसित भारत गारंटी फार रोजगार ते आजीविका मिशन वी.बी जी राम जी कनून 2025 नै पूरे देश च रोजगार पक्का करने, ग्राएं थाहरें आजीविका दे साधन मजबूत करने ते ग्राएं च विकास दी रफ्तार दिती ऐ। केंद्री ग्रामीण विकास, राईबाई ते करसान कल्याण मंत्री शिवराज सिंह चैहान होरें एह गल्ल आक्खी। केंद्री मंत्री शिवराज सिंह चैहान होरें ते आंध्र प्रदेश दे मुख्मन्त्री एन. चंद्रबाबू नायडू होरें अज्ज वी.बी जी राम जी कनून गी आंध्र प्रदेश दे तिरूपति जिले च मुक्कावारिपाले ग्रां च लागू कीता। कट्टु गी संबोधित करदे होई चैहान होरें आखेआ जे एह स्कीम पक्का करग जे कोई बी गरीब मजदूर कम्म बगैर नेई रवे ते हर इक दे हत्थै च रोजगार होना चाइदा। उनें इस स्कीम गी शुरू कराने आस्तै प्रधानमंत्री नरेंद्र मोदी हुंदा धन्नवाद कीता ते आखेआ जे इस कार्यक्रम तैहत रोजगार 100 दिनें थमां बढ़िये 125 दिनें धोड़ी बढ़ी गेआ ऐ।

<><><><><><>

Yadav Ease of Living

केंद्री पर्यावरण, जंगलात ते जलवायु बदलाव मंत्री भूपेंद्र यादव होरें आखेआ ऐ जे सरकार सारें आस्तै जिंदगी अरामदायक बना'रदी ऐ ते ओहदे कन्नो-कन्नो विकास ते टिकाऊपन बश्कार तालमेल बनांदे होई पर्यावरण संरक्षण गी बी पक्का कीता जा'रदा ऐ। इलेक्ट्रिक मोबिलिटी पर राष्ट्री सम्मेलन गी संबोधित करदे होई यादव आखेआ जे सरकार दा कम्मकाज प्रधानमंत्री हुंदे धेइये गी उजागर करदा ऐ जेदे कन्नै अर्थबवस्था ते पर्यावरण दा कन्नोकन्नी बाद्दा होआ'रदा ऐ। उनें आखेआ जे तेज औद्योगिक विकास दे बावजूद देश च जंगलें दा दायरा 2014 च 7 लक्ख 1 ज्हार 673 स्केयर किलोमीटर थमां बढ़िए 7 लक्ख 15 ज्हार स्केयर किलोमीटर होई गेआ ऐ।

<><><><><><>

जम्मू-कश्मीर दे उपराज्यपाल मनोज सिन्हा होरें अज्ज बडुले जम्मू दे भगवती नगर आहले आधार शिविर थमां श्री अमरनाथ यात्रा दे पैहले जत्थें गी खाना कीता। 57 दिनें तगर चलने आहली एह सालाना यात्रा कल्लै थमां कश्मीर घाटी दे पहलगाम ते बालताल आहले दौनें रस्ते राएं शुरु होग। एह सालाना यात्रा 28 अगस्त गी रक्खड़ पुन्नेआ आहले दिन सम्पन्न होई जाग। एह यात्रा अनंतनाग जिले दे नुनवान-पहलगाम रस्ते ते गंदरबल जिले दे बालताल आहले रस्ते राएं हुंदी ऐ। यात्रा लेई पंजीकरण ऑनलाईन ते ऑफलाईन दोनें माध्यमें राएं उपलब्ध ऐ ते यात्रा थमां पैहले गै लगभग 4 लक्ख श्रद्धालुएं यात्रा लेई अपना पंजीकरण करोआई लैते दा ऐ। जम्मू दे भगवती नगर आहले आधार शिवर थमां खाना होए दे श्रद्धालुएं च खासा उत्साह ऐ ओह बम्म-बम्म भोले, हर-हर महादेव दे जयकारे लांदे होई निकले।

<><><><><><>

South-West Monsoon

दक्खन पच्छिम मानसून नै अज्ज दिल्ली बक्खी रूख कीता ऐ। एहदे कन्नै गुजरात दे किश हिस्सें, उत्तर प्रदेश ते मध्य प्रदेश दे मते सारे हिस्सें, हरियाणा, पंजाब ते राजस्थान दे किश हिस्सें च बी मानसून दाखल होई चुके दा ऐ। राश्ट्री राजधानी च बरखा पौने करी गर्मी ते उमस थमां राहत थोई ऐ। मौसम विभाग नै दिल्ली दे मते सारे हिस्सें च अज्ज बरखा पौने दी मेद जाहिर कीती ऐ। पच्छिम ते मध्य भारत च खरी मती बरखा गी लेइयै येलो अलर्ट जारी कीता गेआ ऐ। उत्तर प्रदेश च लोकें गी गर्मी कोला राहत मिली ऐ कीजे मानसून नै उत्तर प्रदेश दे सारे इलाकें च प्रवेश करी लैता ऐ। तोआई, महाराष्ट्र च दुए दिन बी भारी बरखा जारी रेही जेदे कन्नै जन जीवन अस्त-व्यस्त रेआ। मौसम विभाग मूजब कोंकण ते मध्यी महाराष्ट्र दे कन्नै लगदे घाटें पर खरी मती बरखा पौने दी पेशनगोई कीती ऐ। मुम्बई च थल्ले लगदे खेत्तरे च भारी बरखा पौने करी ट्रैफिक ते देल सेवाएं पर माझा असर पेआ ऐ। पोवई तलाब बी लगातार बरखा बरने करी अपने निशान थमां उच्चा बगा'रदा ऐ।

<><><><><><>

Poonch-Weather

भारती मौसम विभाग आसेआ जारी मौसम सरबन्धी चेतावनी दे चलदे पुंछ जिले दे सारे सेहत इदारे गी हाई अलर्ट पर आखेआ गेआ ऐ। पुंछ दे मुख सेहत अधिकारी डा. परवेज अहमद होरें सेहत मैहकमे दे कर्मचारिएं दियां सारियां छुट्टियां रद्द करी दित्तियां न। सारे कर्मचारिएं गी पूरी चाल्ली तैयार रौहने लेई आखेआ गेआ ऐ। सीएमओ पुंछ होरें सारे सीगे, डाक्टर, नीम डाक्टरी अमले ते फील्ड कर्मचारिएं दियां छुट्टियां रद्द करी दित्तियां न। इमरजेंसी वाड्स, एम्बुलेंसस ते जरूरी दोआइयां तैयार रखने लेई आखेआ गेआ ऐ। उनें आखेआ

<><><><><><>

बरखा पर आधारित क्षेत्र सरबन्धत राश्ट्री प्राधिकरण दी सहायता कन्नै चला'रदी चौलें दी जंगली प्रजाति दे संरक्षण दी परियोजना नै असम च मील दा पत्थर हासल कीता ऐ। सोनितपुर जिले च बोरजुली थाह गी इस परियोजना दे तैहत राश्ट्री जैविक विविधता प्राधिकरण आसेआ जैविक विविधता धरोहर अनुसचित कीता गेआ ऐ। इस परियोजना दा मकसद चौलें दी जंगली प्रजाति गी कुदरती तौर पर संरक्षित करना ऐ। भारत च चौलें दी प्रजाति दी विविधता गी बचाना ते पर्यावरण संरक्षण गी ध्यान च रखदे होई राईबाई दा बादा करना इस बक्खी महत्वपूर्ण कदम ऐ।

<><><><><><>

EC-bye polls

चुनांऽ आयोग नै अज्ज 3 विधानसभा हल्कंे च उपचुनाएं दी घोशणा कीती ऐ। एह चुनांऽ बिहार च बांकीपुर, मध्य प्रदेश च दतिया ते गुजरात च मंजालपुर च होंगन। एह चुनांऽ इस म्हीने दी 30 तरीक गी होंगन ते वोटें दी गिनतरी अगले म्हीने 3 तरीक गी होग।

<><><><><><>

Ukraine-Killings

यूक्रेन च रूसी ड्रोंन आसेआ काइव च रिहायशी ईमारतें पर हमले च 13 लोक मारे गए न ते दर्जन घायल होई गए न। स्थानीय मीडिया नै जानकारी दिती ऐ जे जंदी रातीं शहर च धमाकें दी अवाज सुनी गई ही। ब्हाई हमलें दरान बजने आहली साइरन बज्जेआ ते बड़े सारे लोकें मेट्रो स्टेशन च आसरा लैता।

<><><><><><>

FIFA

फीफा विश्व कप च बेल्जियम नै शानदार वापसी करदे होई सेनेगल गी बादू समें च 3-2 कन्नै हराइयै Round of 16 च प्रवेश करी लैता ऐ। हुन Round of 16 च बेल्जियम दा मुकाबला अमरीका ते बोस्निया ते हर्जे गोविना बश्कार होने आहले मैच दे विजेता कन्नै होग। इक होर मैच च कल इंग्लैंड नै कांगो गी 2-1 कन्नै हराई दिता। हुन 6 जुलाई गी Round of 16 च इंग्लैंड दा मुकाबला मैक्सिको कन्नै होग।

<><><><><><>

गृह राज्यमंत्री नित्यानंद राय होरें अजज नमीं दिल्ली च सीमा सुरक्षा बल, भारत तिब्बत सीमा पुलिस ते राश्ट्री सुरक्षा गार्ड माउंट एवरेस्ट ते माउंट ल्होत्से पर कीते गेदे पर्वतारोहण अभिजानें दी सफलता दे उपलक्ष्य च आयोजित ध्वजारोहण समारोह च हिस्सा लैता। इस मौके पर राज्यमंत्री होरें आखेआ जे बीएसएफ दी सारी महिला पर्वतारोहिणं दी टीम दुनिया दी सारें शा उच्ची चोटी पर पुज्जी ते वंदे मातरम गाइये उनें साहत, देशभक्ति ते समर्पण दी अनोखी मिसाल कायम कीती।

<><><><><><>

JK-Medical Equipment

केंद्र सरकार नै जम्मू-कश्मीर च सेहत ढांचग च बड्डा सुधार करदे होई प्रधानमंत्री फंड तैहत 275 ए.आई सक्षम हथै च फगड़ी जाई सकने आहिल्यां एक्स-रे मशीनां, 9 एम.आर.आई यूनिट ते 4 डिजिटल मेमोग्राफी यूनिट्स दित्ते ना। केंद्र सरकार ते सेहत मंत्रालय बश्कार होए दे इक समझौते ज्ञापन मूजब इनें आधुनिक मशीनें गी दूर-दराज दे सरकारी अस्पताले च कायम कीता जाह्ग जेदे कन्नै तौलग बमारी दा पता लाने, टी.बी ते स्तन कैंसर दी तौले जांच ते ईलाज च मदद थ्होग।

<><><><><><>

LG-CBP

उपराज्यपाल मनोज सिन्हा होरें भारती एयरटेल फाउंडेशन, एस.सी.ई.आर.टी जम्मू-कश्मीर ते स्कूली शिक्षा विभाग आसेआ आयोजित इक ध्याडे दे समर्थ निर्माण कार्यक्रमै च हिस्सा लैता। इस मौके पर बोलदे होई एल.जी होरें आखेआ जे एहू पैहलकदमी इक सांझा संकल्प ऐ ते एहू उस बुनियादी सच्चाई गी उजागर करदा ऐ जे जिसलै अस अध्यापकें गी सशक्त बनाने आं तां अस अपने विद्यार्थिणं अंदर विश्वास पैदा करने आं। सिन्हा होरें आखेआ जे जिसलै स्कूल सशक्त बनदे न तां समाज बी मता बी मता बाख्तियार बनदा ऐ ते जिसलै शिक्षा स्टेई दिशा च अगगे बधदी ऐ तां जम्मू-कश्मीर ते कन्नै समूलचा राश्ट्र बी इक मते सुरक्षित ते खुशहाल भविष्य बक्खी अगगे बधदा ऐ।

<><><><><><>

LG-Mobile Care

उपराज्यपाल मनोज सिन्हा होरें एच.डी.एफ.सी बैंक लिमिटेड आसेआ कार्पोरेट सोशल रिस्पॉसिबिलिटी जत्त तैहत मोबाइल मेडिकल कार यूनिट गी रवाना कीता। एहू जत्त एच.डी.एफ.सी परिवर्तन तैहत चलाया गेआ ऐ। उपराज्यपाल होरें एच.डी.एफ.सी बैंक लिमिटेड दे इस जत्त दी सराहना कीती। एहू जत्त जम्मू खित्ते च 27 म्हीनें लेई ऐ। एहदा मुख ध्यान रामबन जिले पर ऐ। बक्ख-बक्ख थाहरें पर एहू मोबाइल केयर यूनिट लोकें दे घरें कश जाइये सेहत सरबन्धी दिक्खभाल आहिल्यां स्थूलतां उपलब्ध करोआग। इस गड्डी च 84 जरूरी दोआइयां ते सुविधा उपलब्ध ना।

Storm-Romania

रोमानिया दी राजधानी बुचारेस्ट ते 20 देशें च कल तेज तूफान आने करी खरा-मता नुकसान होआ ऐ ते 1 बसनीक दी मौत होई गेई ऐ। आपातकालीन सेवां दा आखना ऐ जे बुचारेस्ट च गै सहायता लेई दो ज्हार कालां आइयां जित्थे किश मेट्रो स्टेशनें च पानी भरोची गेआ हा। इस तूफान कननै 60 कस्बे ते ग्रां प्रभावित होए न दर्जनें घरें ते गड्डियें गी नुकसान होआ ऐ।